

**Talamdan sa
Mga Mensahe alang sa Full-time Training
sa Spring Term sa 2023**

**LINANGKOB NGA HISGOTANAN:
ANG MAHINUNGDANONG MGA PUNTO SA KAMATUORAN SA MGA SULAT NI PABLO**

Mensahe 9

**Ang Tulo-usang Dios nga Nagpaambit sa Iyang Kaugalingon
nganha sa Tawong May Tulo-ka-Bahin**

Basahong Kasulatan: 2 Cor. 13:14; Rom. 8:2, 6, 10-11, 14, 16; Gal. 3:26; 4:5-7

- I. Kinahanglan makita nato ang panan-awon sa sentrong butang sa Biblia—ang diosnong tuyo, ang diosnong pamatigayon, ug ang diosnong pagpaambit sa Tulo-usang Dios nganha sa mga magtutuo ni Cristo aron matukod ang iglesia nga Lawas ni Cristo, nga mahingpit sa Bag-ong Jerusalem isip walay kataposan nga hiniusang pagpadayag sa Tulo-usang Dios—Efe. 1:5, 9-11, 22-23; 3:14-21; 4:16; Bug. 21:2, 10-11.**
- II. Naglalang ang Tulo-usang Dios og tawong may tulo-ka-bahin aron mahimong buhing sudlanan nga kasudlan Niya—Gen. 2:7:**
 - A. Ang sukaranong pagtulon-an sa Kasulatan mao nga mga sudlanan ta nga gilalang sa dagway sa Dios aron modawat ug masudlan sa Dios nga bugtong-talagsaong sulod nato—1:26; Rom. 9:21, 23.
 - B. Mga sudlanan gyod unta ta nga bukas ngadto sa Ginoo, kanunayng nagdawatan sa diosnong pagpaambit aron mapadayag ang Dios—2 Cor. 4:7.
- III. Ang paghuman sa diosnong pamatigayon pinaagi man sa diosnong pagpaambit sa Diosnong Trinidad—ang Tulo-usang Dios nga nagpaambit sa Iyang Kaugalingon nganha sa tawong may tulo-ka-bahin—13:14:**
 - A. Ang diosnong pamatigayon mao ang plano ug pagpahaluna sa Dios nga lugwa sa Iyang tinguha ug tuyo; ang diosnong pagpaambit mao ang pagpaambit ug pag-apod-apod sa Dios segun ning planoha ug pagpahalunaa—Efe. 1:3-23; 3:14-21.
 - B. Tanang gihisgotan sa Bag-ong Tugon bahin sa Dios may kalabotan man sa diosnong pagpaambit alang sa diosnong pamatigayon—Rom. 8:3, 11; Efe. 1:3-23:
 1. Ang pinadayag kalabot sa Tulo-usang Dios diha sa balaang Pulong dili man alang sa teolohiya o sa pagsabot ba sa doktrina kondili alang sa pagpaambit sa Dios diha sa Iyang Diosnong Trinidad nganha sa Iyang pinili, tinubos, ug gipanganak pag-usab nga katawhan aron masinati ug mapahimuslan nila—2 Cor. 13:14.
 2. Nahikay na ang Tulo-usang Dios—ang Amahan, ang Anak, ug ang Espiritu—aron mahimong Espiritung taghatag-og-kinabuhi aron mainom nato Siya nga buhing tubig—Juan 4:10:
 - a. Ang Amahan nga tinubdan mao ang tuboran, ang Anak nga pagpadayag mao ang tubod, ug ang Espiritu nga pagpalatay mao ang agay—v. 14; 7:37-39; Bug. 22:1.
 - b. Kini ang diosnong pagpaambit sa Diosnong Trinidad—1 Cor. 12:13; 15:45b.
- IV. Hingpit ug dato nga gipadayag sa Roma 8 ang kalabot sa diosnong pagpaambit; gipadayag ning capituloha kanato giunsa sa Tulo-usang Dios—sa Amahan, sa Anak, ug sa Espiritu—pagpaambit ang Iyang Kaugalingon nganhi sa atong pagkatawo nga may tulo-ka-bahin—espiritu, kalag, ug lawas—aron himoon tang mga anak Niya nga mag-umol sa Lawas ni Cristo—vv. 2, 6, 10-11, 14; Gal. 3:26; 4:5-7:**
 - A. Ang pulong *pagpaambit* nagpasabot og “pag-apod-apod”; maghisgot ngani ta sa diosnong pagpaambit sa Tulo-usang Dios, ang gipasabot nato mao nga giapod-apod sa Dios ang Iyang Kaugalingon kanato, gipaambit ang Iyang Kaugalingon sa atong pagkatawo nga may tulo-ka-bahin.
 - B. Sa Roma 8 naa ang Tulo-usang Dios—ang Amahan, ang Anak, ug ang Espiritu—vv. 2-3, 5, 9, 11, 13-14, 16, 23, 26-27.
 - C. Gihisgotan sa Roma 8:11 ang tulo ka mahinungdanon butang—ang Tulo-usang Dios, ang kahi-kayan, ug ang pagpaambit:
 1. Ning versiculoha naa ang tibuok Tulo-usang Dios: “Niya nga nagbanhaw ni Jesus gikan sa mga minatay” (ang Amahan), si “Cristo” (ang Anak), ug ang “Iyang Espiritu nga nagpuyo ninyo” (ang Espiritu).

2. Ang nagpuyo nato mao ang Tulo-usang Dios nga nahikay na pinaagi sa pagpakatawo, pagkalanang sa krus, ug pagkabanhaw; gipakalawas ang Amahan diha sa Anak, naamgohan ang Anak ingon nga Espiritu, ug nagpuyo sa sulod nato ang Espiritu.
 3. Gisuropan sa pagpaambit sa Tulo-usang Dios ang tibuok natong pagkatawo—v. 11; 1 Tes. 5:23.
- D. Tungod sa pagpaambit sa Tulo-usang Dios nga kinabuhi, kinabuhi (Gk. *zoe*) ang atong espiritu—Rom. 8:10:
1. Ang espiritu nga kinabuhi tungod sa pagkamatarong nagpasabot sa atong tawhanong espiritu nga gipanganak pag-usab—Juan 3:6.
 2. Dili lang kay gipanganak pag-usab ug gibuhi ang atong espiritu; nahimo kining kinabuhi—Rom. 8:10.
 3. Sa pagtuo nato ni Cristo, Siya nga diosnong Espiritu sa kinabuhi nisulod sa atong espiritu ug gisagol ang Iyang Kaugalingon niini aron mahimong usa ka espiritu (1 Cor. 6:17); karon dili lang kay buhi ang atong espiritu—kinabuhi kini.
- E. Tungod sa pagpaambit sa Tulo-usang Dios nga kinabuhi, nahimong kinabuhi ang atong kalag (nga girepresentahan sa atong salabotan); “ang salabotang gipatumong sa espiritu kinabuhi ug kalinaw”—Rom. 8:6.
1. Labi tang makasinati sa salabotang gipatumong sa espiritu nga kinabuhi, labi nga mabag-o ang atong salabotan ug mahimong basihan sa pagtransporma sa atong kalag—12:2; Efe. 4:23.
 2. Ang atong salabotan mao ang nag-unang bahin sa atong kalag, ug sa mabag-o kini, awtomatikong mosunod ang atong pagbuot ug pagbati nga mabag-o sab—Rom. 12:2.
- F. Tungod sa pagpaambit sa Tulo-usang Dios nga kinabuhi, hatagag kinabuhi sa nagpuyo-sa-sulod nga Espiritu ang mga lawas nato nga dunay kamatayon—8:11:
1. Ang pagpaambit sa Tulo-usang Dios nganha sa pagkatawo nato nga may tulo-ka-bahin gipakita sa mga pulong *maghatag og kinabuhi sa inyong mga lawas nga dunay kamatayon* v. 11), nga nagpakita nga nahitabo ang pagpaambit dili lang sa sentro sa atong pagkatawo kondili niabot sab sa sirkumperensya sa tibuok natong pagkatawo.
 2. Dili ang atong espiritu ug salabotan ray kinabuhi, *zoe*; bisan ang atong lawas mapuno sab og *zoe*.
 3. Naghatag ang Dios og kinabuhi sa atong lawas nga mamatay, himalatyon, aron mabuhi ta ug motuman sa Iyang kabubut-on—12:2; Col. 1:9.
- G. Ang Tulo-usang Dios nga nagpaambit sa Iyang Kaugalingon nganha sa tawong may tulo-ka-bahin naghimo sa mga magtutuo nga mga anak sa Dios—Rom. 8:14, 19; Gal. 3:26; 4:5-6:
1. Tungod sa pagpaambit sa Tulo-usang Dios, mahimo tang mga anak sa Dios sa kinabuhi—3:26.
 2. Isip mga anak sa Dios, naa sa sulod nato ang kinabuhi sa Dios, ang kinaiya sa Dios, ug ang Espiritu sa Anak sa Dios—Juan 3:15; 2 Ped. 1:4; Gal. 4:6.
 3. Ang mga anak sa Dios mga bata sa Dios nga naa sa hugna sa pagtransporma sa ilang kalag; dili lang nga gipanganak sila pag-usab diha sa ilang espiritu ug nagtubo diha sa diosnong kinabuhi, kondili nagkinabuhi ug naggawi sab sila nga giniyahan sa Espiritu—Rom. 8:16; 12:2.
 4. Ang kinataposang lugwa sa pagpaambit sa Tulo-usang Dios pagpalugwa mag mga anak nga mahimong mga bahin sa Lawas—8:14; 12:4-5.
- H. Ang pagpaambit sa Tulo-usang Dios sa atong pagkatawo nga may tulo-ka-bahin maghimo natong Dios, sa ato pa, maghimo natong mga anak sa Dios nga sama Niya sa kinabuhi ug kinaiya apan dili sa ranggo sa pagka-Dios:
1. Makita nato sa basahon sa Roma ang kinahabogang punto sa diosnong pinadayag: nahimong tawo ang Dios ug nahimong Dios ang tawo—8:3; 1:3-4.
 2. Ang lalom ug diosnong hunahuna sa Roma mao nga sa kompletong kaluwasan sa Dios matubos, ikapanganak pag-usab, mabalaan, mabag-o, matransporma, ug mahimaya ang mga makasala aron mahimong mga anak sa Dios, nga sama sa Dios sa kinabuhi ug kinaiya aron mahimong mga bahin sa organicong Lawas ni Cristo—3:24; 5:10; 8:14, 29-30; 12:4-5.
- I. Kon pabuhaton nato ang Tulo-usang Dios sa pino ug malumong pagpaambit Niya nganha sa atong pagkatawo nga may tulo-ka-bahin adlaw-adlaw, motubo ta sa kinabuhi tungod sa pagtubo Niya sa sulod nato—Col. 2:19.